

楊家駱主編
中國學術類編

齊國別集
百二十四種
九

鼎文書局印行

楊家駱主編

中國學術類編

鼎文書局印行

清詞別集百三十四種 第九冊

- 七八 周之琦：心日齋詞之一 金梁夢月詞
- 七九 周之琦：心日齋詞之二 懷夢詞
- 八〇 周之琦：心日齋詞之三 鴻雪詞
- 八一 周之琦：心日齋詞之四 退菴詞
- 八二 馮登府：種芸仙館詞之一 花墩琴雅
- 八三 馮登府：種芸仙館詞之二 釣船笛譜
- 八四 馮登府：種芸仙館詞之三 月湖秋瑟
- 八五 楊夔生：眞松閣詞
- 八六 顧 翰：拜石山房詞
- 八七 方履錢：萬善花室詞

○八八 董祐誠：蘭石詞

○八九 龔自珍：定盦詞之一 無著詞

○九〇 龔自珍：定盦詞之二 懷人館詞

○九一 龔自珍：定盦詞之三 影事詞

○九二 龔自珍：定盦詞之四 小奢摩詞

○九三 龔自珍：定盦詞之五 庚子雅詞

○九四 項廷紀：憶雲詞

心日齋詞四種

周之琦（乾隆四七——同治一）

字稚圭。號退庵。河南祥符人。嘉慶十三年進士。官廣西巡撫。詞學元張翥託體至高。黃燮清評之曰。渾融深厚。語語藏鋒。北宋瓣香於斯未墜。譚獻稱其截斷衆流。金鍼度與。雖未及皋文保緒之陳義甚高。要亦倚聲家疏鑿手也。又有心日齋十六家詞選。頗精審。

心日齋詞

辭符周之琦撰

金梁夢月詞

四字令

吟香綺櫺。傳詩翠筒。玉梅纔識春容。釀春光未濃。
虹梁半空。魚波萬重。舊時月色相逢。話家山夢中。

阮郎歸 二首

昨宵同賦冶春詞。芳襟暗共期。今朝卻是送春時。紅螺懶更持。
涼花一枝。哀箏彈損遠山眉。此情金雁知。
朝來春色媚檐牙。晴暉散曙霞。晚來秋影到窗紗。新眉試月華。
羅帳倚。繡簾斜。催歸夢未差。紅燈開作可憐花。今宵真到家。

青玉案

西山顏色仍依舊。只添了、眉痕皺。小院珠簾垂永晝。吟箋半摺。書闌孤倚。長憶分襟後。閒中記曲拈紅豆。風雨還驚夜來驟。曾問南園芳事否。鴛如人懶。花如人醉。春也如人瘦。

一翦梅 春水和李賓石

一鏡煙痕望裏收。咫尺回橋。綠輦香柔。有人扶上木蘭舟。載了春心。蕩了春愁。冶葉傳情恨未休。照影嬋娟。那處妝樓。小紅闌外是西洲。今日東風。明日東流。

蝶戀花

門外垂楊千萬縷。不繫春光。只繫春愁住。文杏巢空雙燕去。紫簫聲裏屏山暮。恨別江郎渾懶賦。一抹煙痕。舊約無尋處。五里東風三里雨。蘼蕪吹冷天涯路。

瑞鶴仙 屠琴鵑舊寓米市胡同雙藤老屋諸同志時時觴詠其閒距今三載

矣嘉慶壬申春杪琴鵑眞州書來重話疇曩因賦此闋爾時同集者劉芙初董琴南朱勳楣謝向亭錢衍石賀耦庚琴鵑及余爲八人皆戊辰同年友也

素天分雁軫。話夢影、揚州月痕初暈。情波寄闌訊。又魚箋手擘。麝煤心印。琴歌興引。且漫說、游蹤未準。但怱怱、側帽吟來。輸與舊時青鬢。還問。雙藤在否。絡架扶牆。幾番紅褪。交枝翠隱。蒼蘚路、有誰認。怕幽禽忘了。花魂清瘦。卻道棲香正穩。倚黃昏、闌角尖風峭寒自忍。

一枝春 白芍藥

婪尾杯深。殿羣芳、付與伶俜花影。嬌姿澹掃。不許綺羅人並。薔薇臥晚。記曾共、曲闌閒凭。空自把、情淚偷含。夢入瑣窗煙冷。湔裙素波低映。漸韶華過卻。將離折贈。東風倦眼。到得粉融酥凝。凝濃春未了。問誰見、玉奴妝靚。還更怕、殘月揚州。杜鵑喚醒。

西湖月 題孤山放鶴圖

巢居不鎖仙心。弄遠影、編襖絳霄風穩。素裳縞袂。澗湖十里。翠峯千仞。圓吭清響遞。更兩兩、瑤笙松吹引。儘戀著、嶺畔梅花。肯說玉京飛近。輭紅我尚淹留。歎蕙帳塵空。怨懷誰訊。故園秋矣。襤褸瘦。翻不堪重認。芝田歸有路。但倦羽商量。期未準。枉回

首、夢裏青山、白雲無盡。

陌上花 七夕

雙星寄語。紅羅亭上。舊香誰采。麗句南唐。吹冷半空仙籟。當時恨與東流去。容易朱顏催改。慶長生唱出。鳳簫一曲。悶持羅帶。話前因夢裏。填橋烏鵲。那見纖雲飛蓋。片石支機。還是聘錢難貸。占絲鈿。合空相約。孤負西樓人待。但清秋。認取梧桐深院。賦情猶在。

念奴嬌 陶然亭懷芙初

江亭送客。話西風。一笛清游曾記。已是離愁消未盡。禁得危闌重倚。別浦凝陰。回塘弄晚。搖漾滄洲意。前番衰柳。向人還又憔悴。長恨千里關山。南雲不見。見蒼煙無際。帽影緇塵。江上路。多分霜絲難理。潮落秋生。水涼夢遠。休喚眠鷗起。相思何許。白蘋紅蓼鄉裏。

解連環 雪意

畫檐岑寂。送寥空倦眼。亂鴉飛急。護凍雲、戲玉猶慳。任翦取鳳翎，不成拋擲。睡起凝龍。但小試、殘年風色。照銀燈點點，絮粉淚痕，何處相識。幽尋灞橋路隔。對薰鑪篆縷。清夢難覓。做幾番、酒醒天寒。喚山寺夜鐘，水樓長笛。萬里蒼茫，倩誰問、飛瓊消息。折梅花、故人故里，寄愁未得。

金縷曲 芙初殘臘抵京況味寂寥次韻賦贈

玉墀春風暖。儘宵深、鑪香飄盡。燭花燒短。店月橋霜經行處，縷縷夢魂誰管。向竹裏、今番重款。別淚青衫痕猶凝。料琵琶、聽徹歌聲輦。閒細數、雁程緩。征塵寫入江南怨。自沈吟、紫簫非舊，翠衾空展。燕麥玄都無人問，況是素絃聲斷。更休訴、京華游倦。鷗鷺江湖還漂泊，甚閒雲、容易隨舒卷。回首處、晉陵遠。

又 夜坐疊前韻

畫鴨香心暖。倚黃昏、歲殘時序，漏長檠短。官閣梅花開猶未，吹破一枝羌管。念獨夜、清尊誰款。彈指春光天街近。漸東風、颺得紅塵軟。吟擁鼻、數聲緩。金梁此夕啼鴉

怨。黯消凝、舊山圖畫。不堪重展。煙夢淒迷無尋處。多事彩雲吹斷。算顧曲、心情都倦。
喚起青鸞歸飛去。看樊樓、十二珠簾卷。千里外、寄愁遠。

三姝媚 櫻桃

垂檐紅半彈。漸錫簫吹殘。茶麝開過。乍啓脣朱。趁小腰蠻舞。玉顏初破。禁苑偷銜。憐
蘸羽、鶯黃微澹。記憶妝樓。閒折嬌春。粉香千朵。還對珍叢婀娜。問露液承盤。爲誰
輕墮。翠籠分攜。送錦鞍歸去。悶拈珠顆。寄遠年年。將恨與、蛟綃俱裹。怕說杯停婪尾。
繁陰夢鎖。

聲聲慢 偕邵季若自窰臺步至江亭菰蒲蕭蕭殊有濠濮閒意

鉤藤礙屐。帶草牽衣。循途恰轉回塘。鏡影幽尋。疏磬漸引雲房。翛然半郊半郭。浣塵
纓。慣詠滄浪。聽醉語、只山僧一笑。識我清狂。回首前游。幾日又西風、吹換石冷苔
荒。倦柳依依。猶戀澹薄秋光。沙鷗漫留後約。怕重來、老卻斜陽。歸未得、但憑高、還睨
舊鄉。

解連環 癸酉秋奉使并門行次恆山驛晉豫分道處也太行山翠紛來邀客

隔河南望鄉思黯然賦寄伯兄次珩

驛塵三輔向郵亭繫馬晚鐘敲雨看荒垣幾日清秋恰疏柳當門鎖牽離緒半枕黃
梁問短夢今宵何處任吟箋唾溼畫燭淚深歸思難賦滹沱去程記否料重尋往
跡爪印非故儘思量南走邯鄲盼漳水銅臺舊鄉雲樹喚客山靈又相約明朝西去
寄愁心雁飛雁落夜長自語

好事近 輿中雜書所見得四闕

杭葦岸纔登行入亂峯層碧十里平沙淺渚又渡頭人立
笳將搖夢上輕舟舟尾浪花溼恰好烏篷小小載一肩秋色
自獲鹿至井陘日三四間渡

詩句夕陽山扇底故人曾說好是固關西去看萬山紅葉
翠蛟潭上認題名屐齒爲君折驀地薜花濃處出一雙胡蝶
陳受室畫扇贈行題詩有好山都在固關西之句
峻坂怯肩輿引綆兩行猶弱幾日牽船岸上只蒲帆難著
一聲碧月大隄頭舊夢

定誰託。何似春風天半。挽秋千紅索。入太行道中。與前以索挽之。

引手摘星辰。雲氣撲衣如溼。前望翠屏無路。忽天門中闕。等閒雞犬下方聽。人住
半山側。行踢千家檐宇。看炊煙斜出。南天門尤陡峻。人多鑿窯而居。

丁香結 雙柏堂偶述用周美成韻

屋角煙疏。井闌人寂。纖影月蛾低隕。歎流光輕迅。玩素景。路指苔階蒼潤。倦懷曾見
否。新寒試。袖薄更忍。天涯凝想。粉淚定逐。鑪香飄盡。秋引。正暗葉吟商。夢覺南雲
雁陣。鈿尺閒拋。紋衾靜倚。一燈初暈。憑寄歸羽信息。送喜箋盈寸。聯萸屏清詠。猶及
霜紅未損。

踢莎行

勸客清尊。催詩畫鼓。酒痕不管衣襟污。玉笙誰與唱消魂。醉中只想瞢騰去。綺席
頻邀。高軒慣駐。悶來卻覓棲鴉語。城頭一角晉陽山。怪他青到無人處。

浪淘沙 擬游晉祠不果

雉堞。幾憑闌。拄笏空看。叢祠依舊鎖雲關。如此嵐光。渾不識。羞渡桑乾。碧玉瀉潺湲。流水生寒。一聲涼雁最無端。桐葉西風多少恨。留與青山。

南樓令 歸次壽陽驛霜氣寒甚

候館閉殘釭。淒淒夜已霜。擁青綾、一昔雲涼。多事西風吹恨去。隨冷月、度回廊。秋夢惱疏狂。征衣惜舊香。有閒心、休著思量。憔悴銀屏山幾疊。渾不耐、漏聲長。

醜奴兒慢 九月十九日望都縣城外書事

輕塵倦馬。酒醒今宵何處。最愁說、瓊簫花外。半壁儲胥。恨入初程。劍歌聲悄壯心孤。圍棋乘興。遲回命屐。一著先輸。鼓吹未閒。淒涼官燭。憔悴軍符。更誰向、平原飛騎。笑挽雕弧。廢壘秋笳。怨吟曾到帳中無。傷心休問。遼空唳鶴。殘月鳴狐。

高陽臺 客有談衛源近事者感賦此調

鴝羽驚媒。龍音感悅。恩恩芳訊偷傳。一紙相思。怨紅啼溼銀箋。連波別有牽魂處。甚回文、倦眼曾看。枉猜他、珠腕閒題。粉淚輕彈。無情河水東流去。打空城寂寞。螢火

飛殘埋玉誰家。秦簫吹冷荒煙。人間多少傷心事。誤南柯、淺醉酣眠。又爭知、孔雀徘徊。還到郎邊。

玉漏遲 耦庚席上賦葛仙米

紺珠塵未掃。綠鸚銜後。黛螺痕小。一捻圓勻。春出玉山香稻。雋味青精漫擬。待糝入、羹湯還好。春又早。紅鹽碧醞。者時情抱。相看句漏雲封。只乞米長安。甌塵閒笑。旅食年年。依舊石田荒了。儘把丹砂寄與。怕夢裏、黃梁人老。鄉信杳。知他雁鴻多少。聞豫中苦飢

喜遷鶯 過米市胡同作

翻階紅藥。尙作意弄晴。雕闌西角。金谷春迷。蕪城天遠。都把俊游拋卻。悶思去年花發。愁惹今年花落。燕飛盡。問悠悠何處。橋邊朱雀。疏箔還更啓。閒拂暗塵。夢短憑誰覺。蠟淚黏螢衣。香化蝶。不記那回行樂。舊歡斷魂人往。新侶探芳人約。賞心事。又從頭聽取。柔奴絃索。

月華清 賦得團扇復團扇

小影兜香圓規倚月。未秋已自惆悵。憔悴回看。幾日乍縈蛛網。記同心、有約相攜。問半面、爲誰羞障。烏巷。負僧彌玉潤。繡窰偎傍。戲蝶游蹤暗想。枉鏡彩重重。細描宮樣。宛轉聲中。禁得倩魂搖颺。掩花容、新恨仍迷。聽絮語、舊情難忘。低唱。付秦淮渡口。那時雙槳。

又 初夏

燕乳飛遲。蠶眠香老。一番婪尾吟後。怕檢羅衫。還怯曉寒襟袖。蘸簾影、綠蔭方重。尋履跡、豔陽難又。孤負。聽鷓鴣花外。那回攜手。伴侶停鍼話久。但強啓窗紗。悶添晴晝。梔子同心。忍見素紈描就。悔拋卻、吹絮光陰。任閒到。熟梅時候。依舊。試榴紅裙衩。爲伊消瘦。

絳都春 綠陰

煙絲遂館。乍約住翠雲。回廊遮徧。做暝弄晴。沾惹離愁。愁無限。淒香滯粉閒凝眄。更

誰識殘紅幽怨。杜鵑何許。怱怱儘把。豔陽催晚。空戀簪花俊賞。是幾度鏡裏朱顏偷換。問取倩魂。那信飛鶯吹還轉。啼妝枉隔春風面。顰黛色。眉痕猶見。悄然青子枝頭。恨長夢短。

蝶戀花 送芙初南歸二解

簾底斜陽紅一線。怕近黃昏。不放銀鉤卷。燭影西堂看又短。金尊只訝宵來淺。賦罷離情魂欲斷。砧杵誰家。喚起征人怨。冷到秋心秋不管。芙蓉卻在江南岸。往日題襟同客邸。一樹垂楊。兩兩吟匏寄。小巷城南三五里。等閒化作盈盈水。天上秋雲吹易碎。送得君歸。卻問歸何計。燕子樓臺斜日裏。江南也是消魂地。天

高陽臺 仙露菴宋宮人餞汪水雲處

白雁聲殘。青蛾淚盡。燕臺別路重分。供奉翠歌。不堪彈入離尊。興亡夢短黃冠老。掩金觴。翠袖含顰。歎西湖。卅六離宮。何處長門。當年環佩空歸去。任花廡戀雨。佛火愁人。臘水殘山。依然鈴語黃昏。紅兜那覓南朝寺。話滄桑。舊額猶存。泣銅仙。承露盤